

Un siman completo di celebracion

Aruba lo celebra “Dia di Boneiro” den grandi



ORANJESTAD-- Manera ta conoci dia 6 di September ta dia Nacional di Boneiro. Pa celebra e dia aki, aña pasa a lanta un comision for di e seno di Union Mutualista Boneriano (Club Boneriano) y algun Boneriano biba na Aruba pa asina oficialisa y engrandec e celebracion di e dia special aki.

Pa conmemora dia di Boneiro e comision ta organisando un siman completo di actividad cu lo cuminsa dia 9 di september y lo culmina dia 15 di september 2013 na Club

Boneriano. Den e siman menciona lo enfoca riba e cultura Boneriano pa medio di diferente charla y entrevista. Sr. Boi Antoin, e conoci periodista/historiador Boneriano lo ta na encargo di e parti aki. Tambe lo bay tin diferente bandanan musical crioyo di Boneiro y Corsou pa duna nan presentacion hunto cu esunnan Arubiano cu lo haci e evento aki uno grandi y lo fortifica e laso di hermandad entre e tres islanan!

Dia 13 di september lo tin e ‘kick-off Happy Hour party’ na Local Store cu Grupo

Crème de la Crème, Grupo Komper, Grupo Rincon Krioyo, Grupo Anto ta cla y mas cu claro Rincon Boyz. Esaki lo cuminsa pa 7:00 p.m. y lo termina pa 2:00 a.m. Entrada lo ta gratis pa un y tur!

Diadomingo dia 15 di september e celebracion di dia di Boneiro lo inicia cu un Santo Sacrificio di Eucaristia na Misa Sta Theresita na San Nicolas, di 8:30 a.m. pa 9:30 a.m. Despues lo sigui cu e celebracion na Club Boneriano

cu un acto di protocol di 10:30 a.m. pa 12:00 p.m. y lo continua pa e acto cultural unda lo tin diferente bandanan musical y gruponan di baile pa entretere e publico presente. Lo bay tin bebidanan refrescante y un cushina amplio, cu un variedad di cuminda crioyo incluyendo cuminda tipico di Boneiro y pasabocanan crioyo.

Pa 5’or di atardi lo subi e cayanan di San Nicolas pa e tradicional Wapa cu musica di e bandanan Rincon

Krioyo, Grupo Komper y Rincon Boyz hunto cu diferente Grupo di Baile y naturalmente cu bishitantenan for di Boneiro, Corsou y tambe e comunidad Arubiano.

Pa e motibo aki e comision Celebracion Dia di Boneiro tin e grato placer di extende un invitacion na pueblo completo di Boneiro y Corsou pa acudi masalmente na e gran celebracion aki, cu tin como meta pa sigui promove hermandad entre e islanan ruman, y alabes celebra dia Nacional di Boneiro. □